

«Jau sai co il schef funcziuna»

Direct suttamess a cusseglier federal Didier Burkhalter

DA CLAUDIA CADRUVI / ANR

■ **Jon Albert Fanzun è creschì si a Tarasp e lavura dapi in onn sco collavuratur persunal en il stab da Didier Burkhalter. Tge fan ins insumma en in tal job?** Ditg in pau salop: Ins ha mo in boss, al qual ins sto far per cumond – e quai è il cusseglier federal. Gnanca ils pli auts schefs dal departament na dastgan dar ordas ad in collavuratur persunal. Ma Fanzun expli- tgescha sia incumbensa sa chapescha main salop e cun auters plets: «Il spezial da mia lavur è da pudair esser al puls da la politica e da cussegliar in cusseglier federal.»

Sch'in cusseglier federal entra en uffizi tscherna el persunas per trais funcziuns che lavuran direct sut el: in collavuratur persunal, in secretari general ed il schef da pressa.

Il joker per schliar problems

«Igl è ina posiziun da fidanza», di Fanzun. «Ins è fitg datiers d'in cusseglier federal. Betg in di è sco tschel. Jau sun ina sort joker per schogliar problems.» Il departament da l'intern haja la pli vasta paletta da dossiers: sanadad, so- cialessa, cultura, statistica, universi- tads, perscrutaziun ed archiv federal. Er il biro d'egualità u «Meteo Svizra» è da chasa en quest departament.

Fanzun s'occupa cunzunt dals dos- siers da sanadad e cultura. Autras in- cumbensas èn da seguir ils dossiers dal cussegl federal, da scriver plets ed ac- cumpagnar *Didier Burkhalter* ad oc-



Cussegliar e gidar il schef dal departament da l'intern è ina sfida. Jon Albert Fanzun fa quai cun plaschair. MAD

currenzias uffizialas. Cunzunt il dossier da sanadad è stà ina gronda sfida per Fanzun, pertge avant n'era el mai s'oc- cupà uschè intensiv da la politica sani- tara.

Il schaner 2010 è Fanzun entrà en piazza e gia in mais pli tard ha el cu- menzà a manar la «task force» da sana- dad. Questa gruppa cun plirs experts discuta impurtantas tematicas da la po- litica da sanadad, elavura strategias, cusseglia e promova il departament tar refurmas sco il «managed care» e la le- scha da prevenziun. Era la cultura haja chaschunà dapli lavur che pensà, cun- zunt las discussiuns pertutgant il film.

Levgiar la vita al schef

En sazez empovian ins sco collavuratur persunal da levgiar uschè bain sco pus- saivel la vita al schef, di Fanzun. Ins stop- pia esser bain cudeschè ed empruvar da cussegliar il schef. Ins mantegna il con- tact cun la fracziun e giaja a las sesidas da partida per adina esser sin il current.

Da l'autra vart tgirian ins il contact cun ils differents uffizis. «Sch'il schef ha ina idea ston ins empruvar da transmet- ter quella en l'uffizi. Ins tschertga vias pragmaticas.» Per insatgi che vegnia d'ordaifer saja quai magari pli simpel che per emploiads che lavurian gia daditg en l'ierarchia da l'administraziun.

«Jau enconusch Didier Burkhalter gia dapi tschintg onns», di Fanzun ch'è stà avant secretari da fracziun da la pld. Gia da lez temp sajan els per part sesids en las medemas cumissiuns. «Jau sai co ch'el funcziuna ed jau sai tge dumon- das ch'el tschenta. Sch'insatgi ma du- monda, tge ch'il schef pensa, pos jau savens dar ina resposta», di Fanzun. Uschia possian ins mintgatant schliar in problem gia avant ch'el arriva tar il schef.

Lungs dis e strusch vacanzas

Els na gijajan betg adina tschient per tschient d'accord in cun l'auter, punctuescha il collavuratur persunal. «Ma nus avain la medema visiun politi- ca e las medemas ideas co schogliar pro- blems.»

Il di da lavur da Fanzun cumenza en- turn las 07.15 e sa drizza suenter l'agen- da dal schef. Tut tenor l'actualità èsi d'organisar discurs cun parlamentar- is u contacts cun l'administraziun. Savens giavischia Burkhalter che ses collavuratur dettia in tschit in in dossier dal cussegl federal e vul dudir l'opiniun.

Ins restia savens fin la saira tard en bi- ro e lavuria tredesch u quatordesch uras. «Jau savev quai gia avant che cumen- zar», di Fanzun. «Sche la lavur na fiss betg uschè fascinanta na fiss gnanc pussaivel. Jau pos far insatge ch'jau fatsch gugent – m'occupar da temas politics. La fascina- ziun per la politica avain nus en famiglia. Gia mes bab ha fatg prest tut sia vita po- litica.»

Durant la sessiun dal parlament lavu-

rian ins pli intensiv e suenter suondian puspè temps pli quieti – per exempel la stad cura ch'il cussegl federal fa vacanzas. Ma gist la stad passada ha Fanzun g'è da preparar il viadi da Burkhalter en Brasi- lia e n'ha uschia strusch fatg liber. Gist perquai ha el uss tant pli plaschair da pu- dair passentar intgins dis tar sia mamma a Tarasp e da sa revegnir là in pau da la politica federala.

Perscrutà relaziuns politics internaziunalas

Jon Albert Fanzun (40 onns) ha studegià politologia a la HSG a Son Gagl ed è sa spezialisà sin re- lazziuns politics internaziunalas – quest champ ha el perscrutà sco doctorand. Il 2003 ha Fanzun obtegnì il premi Rudolf-Mäder per il meglier doctorat en scienza politica e dretg. Tschintg onns ha el lavurà per la pld svizra a Berna: Dus onns e mez è el stà secretari per dumondas da politica exte- riura, segirezza, dretg e migra- ziun, e dus onns è el stà il secre- tari da la fracziun en chasa fede- rala. Dapi l'entschatta 2010 è Fanzun en piazza sco collavuratur persunal da Didier Burkhalter al secretariat general dal departa- ment da l'intern.